

DOGOVOROM I SARADNJOM DO POMIRENJA

Svjesni da polemike i prepucavanja posredstvom medija nikuda ne vode i da koriste samo dušmanima Bošnjaka i Muslimana, grupa intelektualaca iz NVO sektora je riješila da prekine s takvom praksom i da učini nešto kako bi se podjele unutar ove nacionalne zajednice preduprijedile i krenule u suprotnom smjeru, u korist svih. Posredovanjem i velikim pregnućem g. Husnije Redžepagića, višemjesečni prethodni razgovori rezultirali su održavanjem sastanka predstavnika "Matice Muslimanske", "Almanaha" i "Foruma B-M". U Baru su se, uoči Bajrama, 10. X. 2007. sastali predsjednik Matice Muslimanske dr **Avdul Kurpejović**, sekretar Matice Muslimanske **Sabrija Vulić** i potpredsjednik Matice Muslimanske **Semir Smaković**, te urednik "Almanaha" prof. dr **Šerbo Rastoder** i predsjednik IO "Foruma BM" **Suljo Mustafić**, član Foruma BM **Čazim Fetahović**, kao i **Jusuf Kalamperović** koji je bio glavni medijator sastanka i osoba koja je svoje bogato političko iskustvo upotrijebila kako bi sastanak donio pozitivan rezultat, i **Husnija Redžepagić**, glavni posrednik u pregovorima. **Ključno stanovište koje je bilo i uslov zajedničkog sastanka je konstatovanje činjenice da su Bošnjaci i Muslimani jedan narod koji se na posljednjem popisu samoidentifikovao različitim imenima, te da bi svako dalje podvajanje ovoga jedinstvenog entiteta bilo suprotno interesima i onih koji su se samoidentifikovali kao Muslimani, kao i protiv onih koji su se samoidentifikovali kao Bošnjaci.** Suština dogovora je bila da učesnici sastanka predstavljaju isključivo sebe i NVO u kojima su angažovani i da potpisani dogovor prevashodno obavezuje njih i eventualno sve one koji bi im se pridružili u naknadnim dogovorima. U veoma konstruktivnoj atmosferi iskazana je obostrana spremnost da se u postojeće NVO koje okupljaju Bošnjake odnosno Muslimane uključe i svi oni koji su se na posljednjem popisu samoidentifikovali različitim imenima i da prije svega "Matica Muslimanska", "Almanah" i "Kulturni centar BM" postanu otvoreni za sve pripadnike ovog jedinstvenog entiteta. Činjenica je, da će sudbinu ovog značajnog dogovora opredjeljivati politički angažovani protagonisti, prije svega iz redova DPS i SDP, s obzirom da je Bošnjačka stranka pozdravila dogovor i najavila konstruktivan odnos prema njegovom oživotvorenju. Brojni iskazi podrške koji su stigli na adrese učesnika skupa pokazuju da je ovakav dogovor bio preko potreban i poželjan. Ovim putem ih pozivamo da

sitni lični politički čar podrede interesu naroda iz kojeg potiču i pridruže se zajedničkom naporu ka premošćavanju podjela i izgrađivanju jedinstva i sloge bošnjačko-muslimanskog naroda.

Učesnici skupa su potpisali i zajedničku izjavu koja će, nadamo se, biti početak nove i djelotvornije prakse u interesu objedinjavanja potencijala bošnjačko-muslimanskog naroda. Ovo je ujedno i prilika da poslovičnu otvorenost "Almanaha" potvrdimo novim pozivom na saradnju svih zainteresovanih bez obzira na nacionalno ime kojim su se samoidentifikovali.

Prof. dr Šerbo Rastoder, urednik

SAOPŠTENJE ZA JAVNOST

-Polazeći od toga da su Bošnjaci i Muslimani jedinstveni entitet i činjenice da se, na popisu stanovništva iz 2003. godine, taj entitet samoidentifikovao kao Bošnjaci i Muslimani, uvažavaju obje strane kao nespornu činjenicu koju niko ne može negirati


-Pozivamo pripadnike muslimanskog bića Crne Gore bošnjačke i muslimanske nacionalnosti da ubuduće saradjuju i zajedno rade na projektima od interesa za ovu etničku zajednicu i dobro države Crne Gore

-Bilo kakvo negiranje ili omalovažavanje prethodnih činjenica ide na štetu i Bošnjaka i Muslimana

-Potpisnici ovom izjavom upućuju poruku Bošnjacima i Muslimanima Crne Gore i svim pripadnicima islamske vjeroispovijesti čestitaju nastupajući ramazanski Bajram

Potpisnici:

1. Jusuf Kalamperović
2. Prof. dr Šerbo Rastoder
3. Dr Avdul Kurpejović
4. Husnija Redžepagić
5. Čazim Fetahović
6. Sabrija Vulić
7. Suljo Mustafić
8. Semir Smaković



U Baru, 10.10.2007.g.